

Firemon

Pas Por ai Firemonimbo sürü papimarandi

¹Firemon, sihambo pas nda ro Por-anahi sürü paparihandi sihefi wandafi Timoti dibo. Ro Sisas Kraisindi ratüpuri süngunambo karabusiyaha nimboamboanahi asu yihoefi wandafi se ro-babidi mami ratüpuri ratüpuriyefi-rihundeimb-anafi. ²Asu ro sihefi rehi Afiane asu sihefi wandafi Arkipas ai ro-babidi ami nahurai Kraisindi ratüpuri ratüpuriyefi-rihundeimb-ani asu Kraisindi nendi sihafi worambe fandihi-rihundeimb ranaheimbo amboani pas nda sürü paparihandi. ³Ape God Adükari Sisas Krais-dibo ai siheimbo moani hipoambofo hohoanimo asu ngusüfo afurife kifeimbi hohoanimo ra mbisabinandür-amboane.

Firemon ai Adükarimbo ngusüfo parirühi anihondümbo-rirühani

⁴⁻⁵Se Adükarimbo ngusüfo pariworühi anihondümbo-riwori arandi asu Godindi nendi ranaheimbo amboani ngusüfo parowandüri arandi hoafi ra himbori-yahühanahi. Ranimboanahi muṅguambo si ro Godimbo didibafiyahühi ra sihambo hohoanimo-yahaninühi dükariheaninühanahi asu ranimbohünda ro wandi God ranahambo didibafiyahando arihandi. ⁶Se ro-babidi anihondümbofo-rambo animbafi. Ranimboanahi asu ro Godimbo didibafiyahando arihandi sihafi anihondümbofo ranai randeandani aboedi sihafi hohoanimoambe tükümbifeyo sahehea. Sihiri Krais-babidi animboefi asu raninambo ahandi-mayo muṅguambo aboedi moatükuni sihiri masahumindefi ra se ndondo türüboadowandi sahehea didibafiyahando arihandi. ⁷Karihasi wandafi, se Godindi nendi ranaheimbo ngusüfo parowandüri arandi ranimboane asu aheimbo ngusüfoambe nginira-mindindüri arandi. Asu raninambo afindi hihifi-hihfiyahühi wandi ngusüfoambe afure akiaro.

Firemon ai Onesimusimbo wandafimboriri mbiserümandu-wamboane

⁸⁻⁹Se mami moatükuni rambirowanda saheheamboanahi. Ro sihambo Kraisindi süngu randowandi randowandi-ndamboayahi ra yihimbokoate-anahisi, nga ngusüfo pefe hohoanimo rani-süngu sihambo düduwehanini. Sapo ro Por boagiri-yamboanahi asu ro Kraisindi fondühi ahandi hoafi semindi hombo-hündamboanahi, nga haponda ro karabusi-yaheamboanahi. Inga asu ro sihambo ngusüfo pariheaninühi wamboanahi hiniñgrou safi ndarihe hoafiyahanini. ¹⁰Ro sihambo ndarihe düduwehanini Onesimusimbo-hündambo. Aiana wandi nimori hond-ani Kraisindi sünguna. Ro karabusiyahe nimboambo Kraisimbo anihondumbo-fembo yamundimarihini-ani. ¹¹Horombo ana ai moai mamimbo amboani sihambo aboedi farihenini rarani ratüpuri ra, nga hapondan-ambe ana ai se-anafi asu ro-anahi sihehimbo aboedi ninini ratüpuri fandihemunümbui.

¹²Haponda ro ahambo sihambo sowana hihirihini koararihehine asu ai wandi ngusüfoahünd-ani. ¹³Ro aboedi hoafi ra sahamindi hahabodihane ranihümbu wambo ndanihü karabusi-marundira animboahi. Ranimboyahi asu ro Onesimusimbo ndanihü kikihindühü-mindihani asu ai sihafi fondihü wambo mbifarihendira sahehea hohoanimoayahi. ¹⁴Asu awi ro sihambo wambo farihefe-ndirimbo hüti-hütiyoninimbo ana moeisahi, nga moani wambo se randowandi mbisafan-animbo randiheamboayahi. Se sihafi hohoanimonambo refemboanahi randowandi asahi. Ranimbo ana, ro ngiri nini-moatükuni ninüngundiheandi, nga nda wambo se randowandi mbisafan-animbo randiheamboayahi. ¹⁵Ai sihambo akidou hiniñgi-mareanini, nga awi refenasi asüka se ndowarindifani ai se-dibo gedühi mbinüngu-wamboane. ¹⁶Ai se-dibo moani ratüpuriyu-randeimbi-yupoani, nga ngusüfo pariworeimbi wandafimbiyu-wamboane. Inga ra aboedi safane. Se yahurai ahambo ndowarindifi. Ro ahambo ngusüfo pararihini, nga sihambo ai moani ratüpuriyu-randeimbi asu Kriasindi süngu sihafi wandafi kapeih-ani. Ranimbo se ahambo afindi safi ngusüfo pandiwori.

¹⁷Inga asu wambo se sihafi wandaf-anahi asafindiri ana, asu mare yahurai-safi ahambo amboani wandi wandafi mbisafindowohü hühindiwori. ¹⁸Asu ai sihambo moaruwai hohoanimo-yuninühi sihafi-mayo bidifiri moatükuni moani asemündu ana, se süngunambo rani-moatükuni ranahambo wandi ndüri pando mbunda hoafindafindiri. ¹⁹Ro Por wandi warinambo simbori saimbo moatükuni sürü parihe asiheheandi. Ro-animbo sihafi nine-moatükuni ai ramareandi ranimbo sihambo hihirindihe ndahananimboyahi. Inga se wandi sünguyafi anihondumbo-rowandeimbi tükümefoandi rani-nambo se simbori wambo saimbo-aiyafi ranana sihafi fi niñgo hohoanimo rananesi,

ŋga asu ro ŋgiri ranahambo sihambo watapori-mbondihanini. ²⁰Ŋga wandafi, sihiri Adükari-babidi animboehi ranimboane asu se wambo hihifi-hihifindafindiri. Sihiri yibobo Kraisindi nindou-anehi, ŋga ranimbo-hünda se wandi ŋgusüfoambe ndondo kündowandürühi Onesimusimbo wandafi mbisafindowohü hühindiwori. ²¹Se wandi hoafi himbori-ndamboyafi sahehea anihondumbo-riheaninühi pas nda sürü paparihanini. Ro haponda sihambo rani hohoanimo ra randowandi sahehea düduweheanini. Rani hohoanimo ra ŋgasündo hawa asu aboedi adükari hamindi rani-poanimbo randowamboyafi sahehea fifiri-heamboanahi. ²²Awi ro sihambo mami hoafi ŋgorü hoafindahanini samboanahi. Asu se randowandühi wambo sihafi worambe fondi nafindihao hiniŋindowandi. Ŋga ro fifiri-heamboanahi God ai sihei didibafife ra himborindu haya asu wambo siheimbo sowana koandihendiri yahumboani.

Hihifi hoafi bidifiri

²³Epafras ai ro-dibo Sisas Kraisindi hoafi süngunambo karabusiyaho ndanihü animboehi ai sihambo hihifaranini. ²⁴Wandi Kraisindi ratüpuriyefi-rihundeimbi Mak, Aristakus, Dimas asu Ruk ai-amboani sihambo hihifarünini. ²⁵Adükari Sisas Kraisindi-mayo moani hipoambofo hohoanimo ranai sihei ŋgusüfoambe mbimarondür-amboane.